



UNMIK

PROVISIONAL INSTITUTIONS OF SELF GOVERNMENT

KUVENDI I KOSOVËS
СКУПШТИНА КОСОВА
ASSEMBLY OF KOSOVO

Ligji Nr.2004 / 8

PËR ENERGJINË

Kuvendi i Kosovës,

Në bazë të kompetencave që i janë dhënë me Rezolutën 1244 (1999) të Këshillit të Sigurimit të Kombeve të Bashkuara të datës 10 Qershor 1999,

Duke patur parasysh Misionin e Përkohshëm të Administratës të Kombeve të Bashkuara në Kosovë (UNMIK) Rregullorja Nr. 1999/1 të 25 Korrikut 1999, mbi Autoritetin e Administratës së Përkohshme në Kosovë;

Duke u mbështetur në autorizimet që u janë dhënë Institucioneve të Përkohshme të Vetëqeverisjes me Rregulloren e UNMIK-ut Nr.2001/9 të datës 15 Maj 2001, „ Mbi Kornizën Kushtetuese të Vetëqeverisjes së Përkohshme,“ veçanërisht Neni 5.1 (ç), dhe 9.1.26 (a) dhe kështu me radhë,

Në bazë të Nenit 8.1 (r) të Kornizës Kushtetuese mbi kompetencat e rezervuara të Përfaqësuesit Special të Sekretarit të Përgjithshëm;

Duke i njohur nevojat për furnizim të qëndrueshëm dhe kualitativ me energji dhe shfrytësimin efikas të saj, duke përfshirë edhe burimet e ripërtëritshme të energjisë, dhe nevojat për zhvillimin e një tregu konkurent të energjisë;

Vendosi të miratojë si vijon:

LIGJI PËR ENERGJINË

Kreu I
DISPOZITAT E PËRGJITHSHME
Neni 1

Ky ligj përcakton parimet e përgjithshme të strategjisë energjetike dhe programit energjetik në Kosovë; rregullat për sigurimin e furnizimit të qëndrueshëm dhe efikas të energjisë si dhe shfrytëzimin e burimeve të ripërtëritshme të energjisë; vendosjen e rregullave tregut të energjisë; masat tjera të domosdoshme për sigurimin e funksionimit të duhur të aktiviteteve në sektorin e energjisë.

Neni 2

Qëllimet e këtij ligji janë:

- a) të garantojë furnizim të sigurtë, të qëndrueshëm dhe kualitativ me energji;
- b) të promovojë një menaxhim racional dhe të koordinuar të burimeve energjetike;
- c) të inkurajojë ndjenjën e respektit për mbrojtjen e ambientit gjatë zhvillimit të aktiviteteve energjetike;
- d) të promovojë kushtet e zhvillimit të një tregu modern energjetik dhe të sigurojë konkurrencën në tregun e energjisë sipas parimeve të përgjithshme që garantojnë mosdiskriminim, transparencën, barazinë dhe respektin për mbrojtjen e klientit;
- e) të promovojë investimet në sektorin e energjisë;
- f) ta përparojë kohezionin ekonomik dhe shoqëror të Kosovës;
- g) të promovojë integrimin e Kosovës në fushën ekonomike europiane me qëllim të pjesëmarrjes së saj, në të ardhmën, në Bashkimin Europian dhe si hap i parë i përfshirjes së Kosovës si partner i plotë në Tregun e Energjisë të Europës Juglindore;
- h) të promovojë përafrimin gradual të legjisllacionit dhe rregullativës së Kosovës mbi energjinë me legjisllacionin e Bashkimit Europian mbi energjinë si dhe pjesëmarrjen e Kosovës në marrëveshjet dhe konventat relevante ndërkombëtare në të cilat Kosova mund të marr pjesë dhe/ose të antarësohet.

Neni 3

3.1. Terminologjia e përdorur në këtë ligj do të ketë domethënjet në vijim:

„bashkë-prodhimi“ do të thotë proces teknologjik i cili bën prodhimin simultan të energjisë termike dhe elektrike elektrike;

„konsumator“ do të thotë konsumatori për blerje me shumicë ose konsumatori i fundit i energjisë;

„kodet“ nënkuptojnë rregullat teknike të publikuara të vendosura në një dizajn minimal teknik, kërkesat operative dhe standardet për elektroenergjetikë duke përfshirë kodin e rrjetit, kodin e distribucionit, kodin e standardit elektroenergjetik, kodin për mbrojtjen e konsumatorit, kodin e paisjes elektrike, kodin matës dhe kodin tregtar;

„distribuimi“ do të thotë transporti i energjisë elektrike, ngrohjes ose gasit natyror me anë të linjave të tensionit të lartë, të mesëm ose tubacioneve me presion të mesëm ose të ulët më qëllim të dërgimit te konsumatorët, por duke mos përfshirë furnizimin;

„energja elektrike“ nënkupton formën e energjisë e cila transportohet përmes përçuesve metalik;

„konsumatori i privilegjuar“ do të thotë çfarëdo personi fizik ose juridik i cili është i lirë për të blerë energji nga furnizuesi sipas zgjedhjes së tij/saj;

„energja“ do të thotë çdo formë e prodhuar ose e fituar e energjisë (energja elektrike, ngrohja ose gasi natyror) me qëllim të furnizimit ose shitjes;

„**efikasiteti energjetik**“ nënkupton qasjen e integruar që ka për qëllim të ndikojë në sasinë dhe kohën e konsumimit të energjisë elektrike në mënyrë që të reduktohet konsumi i energjisë primare dhe ngarkesa maksimale (piku) duke i dhënë përparësi investimeve në masat për efikasitetin e energjisë, ose masave tjera, sikur që janë kontratat e furnizimit me ndërprerje mbi investimet për ngritjen e kapacitetit prodhues, nëse ky është opcioni më efektiv dhe ekonomik, duke marrë parasysh ndikimin pozitiv në ambient që ka konsumimi i redukuar i energjisë si dhe aspektet e kostos të sigurimit të furnizimit dhe distribuimit lidhur me të;

„**ndërmarrja e energjisë**“ nënkupton ndërmarrjen e energjisë e cila ushtron një ose më shumë nga aktivitetet energjetike në vijim: prodhimin, transformimin, bartjen, distribuimin, furnizimin, tregëtimin ose deponimin e energjisë elektrike, energjisë për ngrohje ose gazit natyror në bazë të një liçence të lëshuar sipas Ligjit për Rregullatorin e Energjisë apo pa liçencë nëse liçenca në fjalë nuk kërkohet;

„**tregu energjetik**“ do të thotë aktivitetet bashkëvepruese afariste dhe teknike të ndërmarrjeve energjetike dhe konsumatorëve të përfshirë në prodhimin, tregtimin dhe furnizimin me energji që e përcaktojnë çmimin e energjisë;

„**Zyra e Rregullatorit për Energji**“ nënkupton rregullatorin e pavarur të aktiviteteve energjetike, që mban kompetencat e përcaktuara në Ligjin për Rregullatorin e Energjisë, këtë ligj dhe ligjet tjera që rregullojnë ushtrimin e aktiviteteve energjetike;

„**sektori energjetik**“ nënkupton aktivitetet të cilat përfshijnë prodhimin, distribuimin, bartjen, shndërrimin/transformimin, tregtimin, ruajtjen dhe furnizimin me energji elektrike, ngrohje dhe gaz;

„**konsumatori përfundimtar**“ nënkupton konsumatorin i cili blenë energjinë elektrike për nevoja të veta;

„**kushtet e përgjithshme për furnizim me energji**“ nënkupton detyrimet teknike dhe ekonomike të përcaktuara nga Zyra e Rregullatorit për Energji për furnizimin e konsumatorëve me energji;

„**prodhimi**“ nënkupton prodhimin e energjisë elektrike, ngrohjes ose ndonjë forme tjetër të energjisë;

„**ngrohja**“ nënkupton çdo formë të energjisë termike e cila është e transformuar nga uji, avulli ose nga ndonjë formë tjetër;

„**caqet indikative**“ nënkupton sasinë e furnizimit të energjisë të prodhuar nga burimet e ripërtëritshme të energjisë ose bashkë-prodhimi;

„**liçensa**“ nënkupton autorizimin e lëshuar nga Zyra e Rregullatorit për Energji që i mundëson bartësit të liçencës të ushtrorë aktivitetet në sektorin e energjisë për të cilat nevojitet licenca në përputhje me dispozitat përkatëse;

„**planifikimi afatgjatë**“ nënkupton planifikimin e nevojave për investim në kapacitetet e prodhimit, bartjes ose distribuimit në baza afatgjatë me qëllim të plotësimit të nevojave për energji elektrike, ngrohje ose gas natyror në Kosovë dhe sigurimit të furnizimit për konsumatorë;

„**paisjet matëse**“ do të thotë instrumentet e regjistruara në regjistrin për pasijet e certifikuar të matjes në Kosovë, që përdoren gjatë procesit të furnizimit me energji;

„**Ministria përgjegjëse për energji**“ do të thotë instanca e Qeverisë që ka përgjegjësi të plotë apo të pjesërishme për sektorin e energjisë;

„**gazi natyror**“ nënkupton lëndën djegëse të gastë e cila liron energji gjatë djegies ose ndonjë procesi tjetër kimik ose fizik dhe që mund të ruhet në depotë për akumulim;

„**sistemi**“ nënkupton një sistem me paisje të ndërlidhura me qëllim të bartjes dhe distribuimit të energjisë elektrike ose energjisë për ngrohje ose gazit natyror për klientët;

„**prodhuesi**“ nënkupton personin fizik apo juridik që prodhon energji elektrike ose ngrohje;

„**burimet e ripërtëritshme të energjisë**“ nënkuptojnë burimet e ripërtëritshme pa fosile të energjisë (era, energjia solare, gjeotermale, valore, ujore, biologjike, gazet tokësore, uzinat për përpunimin e gazeve dhe biogazet);

„**sigurimi i furnizimit**“ nënkupton sigurinë teknike si dhe sigurimin e një sasie adekuate të energjisë për përmbushjen e nevojave të popullit të Kosovës;

„**furnizimi**“ nënkupton shitjen, përfshirë edhe rishitjen, e energjisë në formë të energjisë elektrike, ngrohjes ose të gasit natyror deri te konsumatorët;

„**tarifa**“ nënkupton çmimin e energjisë të vendosur ose miratuar nga Zyra e Rregullatorit për Energji;

„**metodologjia tarifore**“ nënkupton parimet e përgjithshme të përcaktuara nga Zyra e Rregullatorit për Energji të cilat zbatohen gjatë vendosjes së çmimeve të rregulluara;

„**tregtia**“ nënkupton transaksionet e shitjes dhe blerjes ku interesi për energji transferohet pa patur nevojë të mirret pronësia e energjisë;

„**transformimi**“ nënkupton procesin e transformimit të lëndës djegëse dhe burimeve të ripërtëritshme të energjisë në energji;

„**tranziti**“ nënkupton transportimin e energjisë përtej kufirit nacional pa prodhuar dhe konsumuar në atë vend;

„**bartja**“ nënkupton transportimin e energjisë elektrike, ngrohjes ose gazit natyror në sistemin e tensionit të lartë dhe super të lartë, në sisteme ose tubacione me shtypje të lartë, me qëllim të dërgimit te konsumatorët e fundit ose distributorët, por duke mos përfshirë furnizimin;

„**konsumatori për shitje me shumicë**“ nënkupton çfarëdo personi fizik ose juridik i cili blenë energji me qëllim të rishitjes brenda ose jashtë sistemit ku ai është i themeluar;

„**operator i tregut**“ nënkupton personin juridik që është përgjegjës për organizimin dhe udhëheqjen e tregtisë, në marrëveshjet për elektrike dhe pagesa, në mes të prodhuesve, furnizuesve dhe konsumatorëve. Operatori i Tregut, vë para kohe në baraspeshë furnizimin dhe kërkesën financiare.

„**operatori i sistemit distributiv**“ nënkupton personin fizik apo juridik, përgjegjës për operimin, sigurimin e mirëmbajtjes, dhe, nëse është e nevojshme, zhvillimin e sistemit distributive, në një zonë të caktuar dhe ku është e mundshme, ndërlidhjen e këtij sistemi me sisteme të tjera dhe për sigurimin e mundësive afat-gjata të sistemit,

që të mbulojë kërkesat e arsyeshme për distribuimin e energjisë elektrike apo gasit natyror.

“operatori i sistemit bartës” nënkupton personin fizik apo juridik, përgjegjës për operimin, sigurimin e mirëmbajtjes dhe, nëse është e nevojshme, zhvillimin e sistemit bartës në një zonë të caktuar dhe, ku është e mundshme, ndërlidhjen e këtij sistemi me sisteme të tjera, dhe për sigurimin e mundësive afat-gjate të sistemit, që të mbulojë kërkesat e arsyeshme për distribuimin e energjisë elektrike apo gasit natyror.

3.2. Termat e tjerë të përdorur në këtë ligj, do të kenë domethënie e cekur në Ligjin për Energjinë Elektrike apo në Ligjin për Rregulatorin e Energjisë.

Kreu 2 **Strategjia, programet dhe balancimi**

Neni 4

4.1. Dokumenti themelor që përcakton politikat energjetike dhe të planifikimit për zhvillimin e sektorit energjetik në Kosovë është Strategjia e Energjisë.

4.2. Strategjia e Energjisë do të:

- a). sigurojë furnizim të sigurtë, të qëndrueshëm dhe kualitativ me energji;
- b). promovojë balancin afatgjatë në zhvillimin e sektorit të energjisë duke marrë parasysh paqëndrueshmëritë (lëkundjet, fluktuacionin) në konsumin e energjisë;
- c). mundësojë shfrytëzimin maksimal të burimeve të energjisë në disponim në Kosovë;
- d). promovojë shfrytëzimin e burimeve të ripërtëritshme të energjisë;
- e). sigurojë përdorimin efikas të energjisë;
- f). mbrojtë konsumatorët e energjisë;
- g). mbrojtë mjedisin jetësor gjatë kryerjes së aktiviteteve të energjisë;
- h). promovojë investimet në sektorin e energjisë;
- i). promovojë konkurrencën në sektorin e energjisë bazuar në parimet e jo diskriminimit dhe transparencës;
- j). lehtësojë lidhjen e sistemit të energjisë së Kosovës ose pjesëve të saj me sistemin e energjisë të Europës ose me sistemet e vendeve të tjera.

4.3. Pjesë përbërëse e Strategjisë së Energjisë janë obligimet që ka Kosova si palë në marrëveshjet dhe konventat ndërkombëtare, veçanërisht lidhur me investimet në sektorin e energjisë, tranzitin dhe kyçjen në sistemet ndërkombëtare dhe rajonale.

4.4. Strategjia për Energjinë, mbulon një periudhë për dhjetë (10) vjet. Strategjia për Energjinë, propozohet nga Ministria Përgjegjëse për Energji pas konsultimeve me Zyren e Rregullatorit për Energji, operatorët e sistemit, dhe me organet rajonale mbikqyrëse, të aprovuar nga kabineti i Ministrave dhe miratuar nga Kuvendi.

Neni 5

5.1. Bazuar në Strategjinë e Energjisë, Ministria Përgjegjëse për Energji do të përgatisë dhe miratojë Programin për Zbatimin e Strategjisë për një periudhë minimale tri vjeçare.

5.2. Programi për Zbatimin e Strategjisë do të përcaktojë aktivitetet që duhen zbatuar duke përfshirë edhe programet për:

- a). përmbushjen e synimeve afat-gjate zhvillimore;
- b). sigurimin e udhëzimeve për zhvillimin e sektorit energjetik;
- c). sigurimin e stimulimeve për të inkurajuar shfrytëzimin efikas të energjisë;
- d). sigurimin e stimulimeve për investime në burimet e ripërtitshme të energjisë dhe pajisjeve për eksploatimin e tyre;
- e). konstatimin e investimeve të nevojshme në infrastrukturën publike si dhe masën e investimeve të pritura nga investitorët privatë në aktivitetet e ndërlidhura energjetike.

5.3. Programi për Zbatimin e Strategjisë do të caktojë njësitë përgjegjëse për ushtrimin e aktiviteteve të planifikuara si dhe orarin për realizimin e politikave dhe programeve të Strategjisë, bashkëpunimin e nevojshëm me qeveritë dhe institucionet lokale në lëminë e planifikimit të sektorit të energjisë si dhe bashkëpunimin e nevojshëm me ndërmarrjet e energjisë dhe organizatat ndërkombëtare.

5.4. Në mënyrë që të sigurohet financimi i Programit për Zbatimin e Strategjisë, do të vendoset një fond i veçantë sipas një ligji të veçantë. Ai ligj do të përcaktojë burimet e financimit, organet menaxhuese si dhe kompetencat e përgjegjësitë e tyre përkatëse dhe çështjet e tjera në lidhje me vepritarinë e fondit.

5.5. Pas skadimit të Programit për Zbatimin e Strategjisë, Ministria përgjegjëse për Energji do t'i raportojë Kuvendit mbi Programin për zbatimin e Strategjisë dhe do t'i propozojë ndryshimet e nevojshme për Strategjinë e Energjisë.

5.6. Ministria Përgjegjëse për Energji paraqet një raport vjetor, para Kuvendit, mbi aktivitetet e tyre për Programin e Zbatimit të Strategjisë, së bashku me një raport financiar të Fondit.

Neni 6

6.1. Ministria përgjegjëse për energji do të miratojë bilancet afat-gjate dhe vjetore të energjisë që do të parashikojnë kërkesën për energji, burimet (llojet) e energjisë dhe masat që do zbatohen për përmbushjen e kërkesës. Bilancet afat-gjate dhe vjetore të energjisë elektrike do t'i propozohen Ministrisë përgjegjëse për energji nga operatori i sistemit të bartjes pas konsultimeve me Zyren e Rregullatorit për Energji.

6.2. Balanci afatgjatë i energjisë miratohet për një periudhë 10 vjeçare. Azhurnimet e balancit afatgjatë të energjisë miratohen çdo dy vjet.

6.3. Komponentet mandatore të dokumentit të Balancit afatgjatë të energjisë janë:

- a). parashikimi i kërkesave për llojet e veçanta të energjisë;
- b). parashikimi i furnizimit për llojet e veçanta të energjisë;
- c). mënyra për përmbushjen e kërkesave për burimet e veçanta të energjisë duke përfshirë energjinë primare (burimet e ripërtërishme dhe jo të ripërtërishme) dhe energjinë përfundimtare;
- d). Parashikimi i lirimit të substancave të dëmshme nga burimet e energjisë si dhe ndikimi që ka në mjedin prodhimi dhe shfrytëzimi i energjisë;
- e). një listë të niveleve të nevojshme të deponimit dhe kapacitetit rezervë të nevojshëm për sigurimin e shkallës së planifikuar të qëndrueshmërisë (stabilitetit) të furnizimit.

6.4. Balanci vjetor i energjisë do të miratohet jo më vonë se 15 dhjetor të vitit në vijim, për vitin e ardhshëm.

6.5. Pjesët mandatore të Balancit vjetor të energjisë janë:

- a). konsumi vjetor i lëndëve të para të energjisë, nivelet e rezervave dhe kapacitetet rezervë;
- b). niveli vjetor i kapacitetit rezervë (kufiri i rezervës) i centraleve të energjisë dhe pajisjeve;
- c). nivelet e duhura të rezervave operative çdo vit dhe kriteret lidhur me efikasitetin e energjisë për çdo vit.

6.6. Ministria përgjegjëse për energji nxjerrë Rregullat e Bilancit të Energjisë, që përshkruajnë mënyrën dhe përmbajtjen e paraqitjes së të dhënave nga organet qeveritare, qeveritë lokale, ndërmarrjet e energjisë, dhe operatorët e tregut tek Ministria përgjegjëse për energji me qëllim të hartimit të Balancit të energjisë.

Neni 7

Pikëpamet e qeverive lokale do të mirren me qëllim të përgatitjes dhe zbatimit të Strategjisë Energjetike, Programit për Zbatimin e Strategjisë dhe Bilanceve Energjetike për komunat e tyre përkatëse.

Neni 8

Operatorët përkatës të sistemit përgatisin planet zhvillimore që janë në përputhje me Strategjinë e Energjisë, Programin për Zbatimin e Strategjisë dhe Bilancet Energjetike.

Kreu 3 **Efikasiteti i energjisë, burimet e ripërtëritshme të energjisë, dhe bashkë-prodhimi**

Neni 9

- 9.1. Politika efikase e energjisë është pjesë përbërëse e Strategjisë së Energjisë.
- 9.2. Qëllimi i politikës efikase të energjisë është nxitja e shfrytëzimit efikas të energjisë dhe burimeve të energjisë, promovimi i burimeve të ripërtëritshme të energjisë dhe bashkëprodhimit.
- 9.3. Gjatë vëzhgimit të mjaftueshmërisë së furnizimit, një program ekonomik për efikasitetin energjetik mund të zvogëlë nevojën për prodhim kapital shtesë. Menaxhimi i kërkesës dhe lëvizja e ngarkesës janë mjete të rëndësishme për sigurimin e furnizimit.

Neni 10

Lidhur me implementimin e një politike efikase të energjisë, Ministria përgjegjëse për sektorin e energjisë kryen punët si në vijim:

- a). përgatitë programet implementuese dhe promovon shfrytëzimin efikas të burimeve të ripërtëritshme të energjisë;
- b). përgatitë propozimet për stimulimin e shfrytëzimit efikas të energjisë dhe burimeve të ripërtëritshme të energjisë;
- c). mbikëqyrë efikasitetin e energjisë dhe realizimin e kapaciteteve kursyese;
- d). i siguron publikut të dhëna në lidhje me çështjet e efikasitetit të energjisë;
- e). nxitë kontrollet e energjisë dhe planet zhvillimore lokale kursyese të energjisë;
- f). përgatitë aktet nënligjore, pas konsultimit me Zyrën e Rregullatorit për Energji për promovimin e shfrytëzimit efikas të energjisë dhe shfrytëzimin e burimeve të ripërtëritshme të energjisë;
- g). nxitë operimin e organizatave joqeveritare që veprojnë në interesin e përgjithshëm në sektorin e energjisë;
- h). promovon rritjen e kontributit të burimeve të ripërtëritshme të energjisë për prodhimin e energjisë në tregun e brendshëm dhe tregjet rajonale të energjisë elektrike në përputhje me objektivat e synuara të përcaktuara në nenin 12 të këtij ligji.

Neni 11

Pjesëmarrësit tjerë në sektorin e energjisë kryejnë detyrat që kanë të bëjnë me implementimin e një politike efektive të energjisë dhe promovimin e burimeve ripërtirëse të energjisë si vijon:

- a). gjatë shpërndarjes së prodhimit, operatori i sistemit të bartjes duhet t'i japë përparësi prodhimit që shfrytëzon burimet e ripërtërishme të energjisë siç lejohet me Kodin e Rrjetës dhe rregullat dhe rregulloret tjera të aplikueshme;
- b). operatorët e sistemit përcaktojnë dhe publikojnë rregullat standarde mbi atë se kush i bartë shpenzimet e adaptimeve teknike, siç janë lidhjet e sistemeve dhe përforcimet e sistemeve, të domosdoshme për integrimin e prodhuesve të rinj që furnizohen me energji elektrike të prodhuar nga burimet e ripërtërishme të energjisë në sistemin e ndërlidhur. Këto rregulla që miratohen nga Zyra e Rregullatorit për Energji, duhet të jenë në përputhje me Strategjinë e Energjisë dhe duhet të bazohen në kritere objektive, transparente dhe jodiskriminuese veçanërisht duke marrë parasysh të gjitha shpenzimet dhe përfitimet që dalin nga lidhja e këtyre prodhuesve me sistemin;
- c). operatorët e sistemit i sigurojnë çdo prodhuesi të ri, që dëshiron të jetë i lidhur, vlerësimin e plotë dhe të hollësishëm të shpenzimeve që dalin nga lidhja;
- d). operatorët e sistemit përcaktojnë dhe publikojnë rregullat standarde lidhur me ndarjen e shpenzimeve të sistemeve të instalimit ndërmjet të gjithë prodhuesve që përfitojnë prej tyre, siç janë lidhjet në sistem dhe përforcimet. Këto rregulla që miratohen nga Zyra e Rregullatorit për Energji, duhet të jenë në përputhje me Strategjinë e Energjisë dhe aktet nënligjore të aplikueshme mbi metodologjitë e tarifave;
- e). Zyra e Rregullatorit për Energji siguron që taksat e bartjes dhe distribuimit nuk shkaktojnë diskriminim ndaj energjisë elektrike të prodhuar prej burimeve të ripërtërishme të energjisë, duke përfshirë posaçërisht burimet e energjisë elektrike nga burimet e ripërtërishme të energjisë të prodhuar në rajonet periferike, siç janë rajonet me dendësi të ulët të popullatës;
- f). Zyra e Rregullatorit për Energji realizon dhe promovon energjinë duke ekzekutuar kontratat dhe duke nxitur ndërmarrjet për instalimin e kapaciteve të zgjeruara pa shpenzime fillestare, të ripaguara përmes llogarive të kursimit;
- g). gjatë caktimit të tarifave, Zyra e Rregullatorit për Energji mund të sigurojë burime financimi përmes tarifave, të implementuara nga palët e treta të zgjedhura më ofertim konkurrues, duke operuar sipas një procedure transparente.

Neni 12

12.1. Ministria përgjegjëse për Energji përcakton çdo vit caqet indikative për kërkesën (konsumin) e energjisë elektrike ose të ngrojes, të prodhuar nga burimet e ripërtërishme të energjisë ose bashkëprodhimi.

12.2. Caqet indikative caktojnë përqindjen e kërkesës bruto të energjisë në Kosovë për dhjetë vitet në vijim.

12.3. Caqet indikative shoqërohen me nga një raport që përvijon në vija të trasha masat e ndërmarra a të planifikuara, për arritjen e tyre. Ky raport merr parasysh:

- a). parimet e tregut të energjisë;
- b). karakteristikat e burimeve të ndryshme të ripërtëritshme të energjisë dhe teknologjitë e prodhimit;
- c). nevojën për zhvillimin e konkurrencës ndërmjet prodhuesve.

12.4. Në përputhje me dispozitat e Ligjit për Rregullatorin e Energjisë, Zyra e Rregullatorit për Energji siguron që prejardhja e energjisë elektrike së prodhuar nga burimet e ripërtëritshme të energjisë mund të garantohet si e tillë në pajtim me kriteret objektive, transparente dhe jodiskriminuese.

Neni 13

Ndërmarrjet e energjisë që furnizojnë me energji elektrike, ngrohje ose gas, duhet, të paktën një herë në vit, t'i informojnë konsumatorët e tyre për trendet dhe treguesit kryesorë lidhur me konsumin e energjisë. Në këtë kontekst, ata mund të përgatisin programe, që në mënyrë të drejtë nxisin dhe udhëzojnë konsumatorët e tyre për shfrytëzimin efikas të energjisë së shfrytëzuar dhe për arritjen e kursimeve në energji.

Neni 14

14.1. Importuesit dhe prodhuesit e produkteve të konsumit të përgjithshëm që shfrytëzojnë enegji gjatë aktiviteteve të tyre duhet të vëjnë tiketën e efikasitetit energjistik në produktet e tyre, me të cilën informon konsumatorët mbi konsumimin e energjisë dhe tiparet e tjera të produktit që janë të rëndësishme për efikasitetin e tyre energjistik.

14.2. Ministria përgjëgjëse për energji vendosë formën dhe përmbajtjen e tiketave, mënyrën e matjes dhe konstatimit të konsumimit të energjisë, karakteristikat e tjera të produktit dhe metodën për klasifikimin e produktit në lidhje me efikasitetin e tij energjistik.

14.3. Kërkesat e përmendura në paragrafin (2) të këtij neni mund të përcaktojnë që tiketat të jenë të detyrueshme për disa lloje të caktuara të produkteve.

14.4. Dispozitat e këtij neni zbatohen për marka/shenja/ të tjera të produkteve dhe paisjeve, siç është marka e efikasitetit energjistik dhe specifikacioni energjistik i ndërtesave.

Kreu 4 Investimet

Neni 15

15.1. Promovimi i investimeve për modernizimin, riparimin dhe zgjerimin e kapaciteteve ekzistuese të prodhimit, sistemet e bartjes dhe distribuimit duhet të jenë në interesin e Kosovës.

15.2. Ndërtimi i stabilimenteve dhe pajisjeve të reja energjetike si dhe mirëmbajtja e shfrytëzimi i tyre duhet të inkurajohet në Kosovë, me kusht që ndërtimet e tilla të jenë në përputhshmëri me parimet e efikasitetit energjetik.

15.3. Duhet të inkurajohen investimet private në sektorin e energjisë dhe investimet e favorshme të jashtme, kurse kushtet për “buy – back” (*kompenzim tregtar të ndërsjellë*) vendosen me qëllim të tërheqjes së investimeve të çfarëdo lloji si për ndërtimin e pajisjeve të reja energjetike ashtu edhe për modernizimin, riparimin dhe zgjerimin e kapaciteteve ekzistuese të prodhimit si dhe sistemeve të bartjes dhe distribuimit.

Kreu 5 Rregullimi ekonomik i aktiviteteve energjetike

Neni 16

16.1. Rregullimi ekonomik i aktiviteteve në sektorin e energjisë duhet të zbatohet në përputhshmëri me Ligjin për Rregullatorin e Energjisë.

16.2. Aktivitetet e energjisë në sektorin e energjisë duhet që të ushtrohen ose në bazë të liçencës ose pa liçencë për ato aktivitete të cilat janë përjashtuar nga kërkesa për marrjen e liçencës në pajtim me Ligjin për Rregullatorin e Energjisë.

Neni 17

17.1. Aktivitetet energjetike ushtrohen në bazë të rregullave që i rregullojnë ato si aktivitete të bazuara në treg ose si shërbime publike.

17.2. Të gjitha ndërmarrjet energjitike i shërbejnë interesit të konsumatorëve individual duke siguruar furnizim të sigurtë, efikas dhe të qëndrueshëm me energji elektrike, energji për ngrohje dhe gas natyror kualitativ; duke siguruar shfrytëzimin efikas të burimeve energjitike; njëkohësisht duke respektuar mbrojtjen e ambientit, shëndetit, jetës dhe pronës së popullit të Kosovës.

17.3. Zyra e Rregullatorit për Energji mund të vendosë detyrime shtesë të shërbimeve publike për ndërmarrjet që ushtrojnë shërbime publike në lidhje me sigurinë dhe qëndrueshmërinë e furnizimit, rregullsinë, kualitetin, çmimin e furnizimit si dhe mbrojtjen emjedisit. Detyrimet në fjalë duhet të jenë të definuara qartë, të mos jenë diskriminuese dhe të jenë të verifikueshme dhe në përputhshmëri me direktivat e Bashkimit Europian.

17.4. Çmimet dhe shpenzimet e bëra nga ndërmarrjet energjitike në lidhje me paragrafin (3) të këtij neni njihen si çmime dhe shpenzime të arsyetuara.

Neni 18

18.1. Çmimet e energjisë mund të jenë të rregulluara ose të pa rregulluara, varësisht nga ajo nëse ekziston apo jo tregu që mundëson çmime të parregulluara (të vendosura lirshëm ndërmjet blerësit dhe shitësit).

18.2. Çmimet e rregulluara të energjisë vendosen në bazë të tarifave që miratohet nga Zyra e Rregullatorit për Energji.

18.3. Çmimet e rregulluara të energjisë rregullohen ose miratohen në përputhshmëri me Metodologjinë tarifore të përgatitur nga Zyra e Rregullatorit të Energjisë.

18.4. Sistemi tarifor siguron stimulime për promovimin e efikasitetit të energjisë dhe menegjimin e kërkesës, duke përfshirë edhe promovimin e shfrytëzimit të burimeve të ripërtëritshme të energjisë.

18.5. Ndërmarrjet e energjisë mund të aplikojnë për njohjen dhe kompensimin e shpenzimeve të pakthyeshme ose të dështuara.

18.6. Çmimet e pakthyeshme ose të dështuara janë çmime që rezultojnë nga investimet e bëra dhe transaksionet e përmbyllura nga ndërmarrjet e energjisë elektrike para hyrjes në fuqi të këtij ligji, këto çmime të arsyeshme nuk mund të kthehen për arsye të vendosjes së tregut konkurrues.

18.7. Zyra e Rregullatorit për Energji vendosë shumën maksimale dhe periudhën e kompensimit të çmimeve të njohura dhe të pakthyeshme për ndërmarrjet energjetike në përputhshmëri me rregullat dhe procedurat në bazë të Ligjit për Rregullatorin e Energjisë dhe direktivat e Bashkimit Europian.

Neni 19

19.1. Ndërmarrjet energjetike që ushtrojnë aktivitete të energjisë në fushën e energjisë elektrike, ngrohjes dhe gasit natyror janë të obliguara të mbrojnë informatat konfidenciale afariste të përvetësuara gjatë ushtrimit të aktiviteteve dhe detyrave të tyre sipas këtij ligji, përveç nëse me ligje të tjera kërkohet që informatat e tilla të publikohen ose t'u vihen në dispozicion organeve qeveritare.

19.2. Vendimi se cilat informata do të konsiderohet si konfidenciale do të merret në pajtim me Ligjin për Rregullatorin e Energjisë dhe akteve nën-normative të nxjera nga Zyra e Rregullatorit për Energji.

Neni 20

Ndërmarrjet energjetike përgatisin, dorëzojnë për revizion dhe publikojnë deklaratat e kontabilitetit në pajtim me ligjet që rregullojnë kontabilitetin në Kosovë. Ndërmarrjet energjetike që nuk janë ligjërisht të obliguara të publikojnë kontabilitetin e tyre vjetor obligohen të mbajnë kopje të këtyre llogarive në regjistrin publik në zyrën e tyre kryesore.

Kreu 6

Konkurrenca në aktivitetet e energjisë

Neni 21

21.1. Të gjitha vendimet ndërmjet ndërmarrjeve të ndërlidhura, të asociuara ose të shkruara si dhe të gjitha praktikatat e qëllimshme të dy ose më shumë ndërmarrjeve janë të ndaluara nëse praktikatat ose vendimet në fjalë kanë për qëllim parandalimin, kufizimin ose ç'rregullimin e konkurrencës në tregun e energjisë përmes:

- a). rregullimit të drejtpërdrejtë ose të tërthortë të çmimeve ose kushteve të tjera tregtare;
- b). ndarjes së tregjeve ose burimeve të furnizimit;
- c). kufizimit ose kontrollimit të prodhimit, tregtimit, zhvillimit teknik ose investimeve në energji;
- d). zbatimit të kushteve të ndryshme ndaj personave të caktuar për llojin e njejtë të kontratës, gjë kjo që i vë këta persona në pozitë të pabarabarta si konkurrentë;
- e). përmblylljes së kontratave me kusht që pala tjetër të marrë obligime shtesë ose të përmblyllë kontrata sekondare që për nga karakteri i tyre ose sipas praktikave të zakonshme nuk kanë të bëjnë me lëndën e kontraktuesit kryesor ose përmbushjes së kontratës së tij.

21.2. Të gjitha marrëveshjet dhe vendimet që janë në kundërshtim me paragrafin (1) të këtij neni janë të pavlefshme.

Neni 22

Ndërmarrjet energjetike me pozitë dominuese, konsiderohet se e kanë abuzuar pozitën e tyre nëse:

- a). drejtpërdrejt ose tërthorazi vendosin çmime të pa justifikuar për shitjen ose blerjen e energjisë dhe kur vendosin kushte tjera të padrejta të tregëtimit;
- b). kufizojnë prodhimin, tregëtimin dhe zhvillimin teknik në dëm të klientëve, duke përfshirë edhe krijimin mungesës së artikujve duke shkatërruar, dëmtuar ose procesuar në mënyrë të paarsyeshme pajisjet;
- c). ushtrojnë varësi ekonomike si rezultat i së cilës vie deri te transformimi, shkrirja, bashkimi, ndarja ose përmeldhja e ndërmarrjeve të tjera si dhe keqësimi i pa justifikuar i marrëdhëneve afariste afatgjatë.

Neni 23

23.1. Është i ndaluar përvetësimi, shfrytëzimi dhe zbulimi i sekreteve afariste ose tregtare në kundërshtim me praktikatat e drejta tregtare.

23.2. Përvetësimi i fshehtësive të prodhimit ose tregtimit është në kundërshtim me praktikatat e drejta tregtare atëherë kur përvetësimi është bërë përmes përgjimit, infiltrimit ose kushtëzimit, hapjes së korrespondencës (letrave), fotografimit ose

hetimit pa lejen paraprake të pronarit të dokumenteve ose materialeve të ruajtura me qëllim të kufizimit të qasjes në to, si dhe përmes mashtrimit ose ofrimit të përfitimeve për personat që kanë qasje në fshehtësitë e tilla për shkak të marrëdhënjeve të tyre afariste ose kontraktuese.

23.3. Shfrytëzimi ose zbulimi i fshehtësive të prodhimit ose të tregtimit është i ndaluar atëherë kur fshehtësitë e tilla janë përvetësuar me kusht që të mos shfrytëzohen ose zbulohen.

Neni 24

Zyra e Rregullatorit të Energjisë do t'i fusë në fuqi dispozitat e këtij kapitulli, në pajtim me Ligjin e Rregullatorit të Energjisë dhe me çdo ligj tjetër mbi konkurrencën që është i zbatueshëm në Kosovë.

Kreu 7 Masat kufizuese mbi furnizimin me energji

Neni 25

25.1. Qeveria mund të vendosë masa për kufizimin e furnizimit me energji për konsumatorët, ose të vendosë obligime të veçanta për ndërmarrjet energjitike në këto raste:

- a). çfarëdo “force majeure”;
- b). çfarëdo aksidenti material në instalimet për prodhimin dhe bartjen e energjisë elektrike, energjisë për ngrohje ose gasit natyror;
- c). çfarëdo shkurtese të papritur ose afatgjate të kapacitetit energjetik ose bartjes së energjisë;
- d). çfarëdo aktiviteteve terroriste.

25.2. Qeveria mund të vendosë masat në vijim:

- a). të vendosë kufizime mbi tregtimin me burime të caktuara të energjisë;
- b). të vendosë kushte të veçanta të tregtimit;
- c). të kufizojë eksportimin dhe importimin e energjisë ose të vendosë kushte të veçanta për eksportimin dhe importimin e energjisë;
- d). të detyrojë prodhimin e energjisë;
- e). të vendosë detyrime për furnizimin me energji për konsumatorë të caktuar.

25.3. Ministri përgjegjës për Energji shpallë të gjitha masat kufizuese përmes mjeteve të informimit publik.

25.4. Mënyrat e kufizimit të prodhuesve dhe konsumatorëve të energjisë elektrike, energjisë për ngrohje dhe gasit natyror përcaktohen me akt nënligjor që miratohet nga Qeveria me propozimin e Ministrisë përgjegjëse për energji.

25.5. Ndërmarrjet e energjisë nuk janë të detyruara të paguajnë çfarëdo dëmi të shkaktuar si rezultat i kufizimeve apo ndërprerjeve në furnizimin me energji elektrike, ngrohje ose gas natyror të përshkruara në paragrafin (1) të këtij neni, me përjashtim të atyre rasteve kur aksidentet ose ndërprerjet afatgjate janë bërë si rezultat i neglizhencës së tyre.

Kreu 8 **E drejta e kalimit dhe qasjes në pronë**

Neni 26

26.1. Ndërtimi ose zgjerimi i stabilimenteve energjetike për bartjen ose distribuimin e energjisë elektrike, ngrohjes ose gazit natyror bëhet në tokë që është në pronësi të ndërmarrjes për energji dhe në të cilën ekziston e drejta për ndërtim.

26.2. Nëse ndërtimi ose zgjerimi i stabilimenteve të përmendura në paragrafin (1) të këtij neni bëhet në pronë private, Zyra e Rregullatorit të Energjisë duhet të verifikojë se toka në fjalë është e nevojshme për bartjen ose distribuimin e energjisë dhe pronari i tokës ka të drejtë kompensimi për dhënjen e të drejtës së ndërtimit, në një shumë të barabratë me vlerën e tregut.

26.3. Nëse ndërtimi ose zgjerimi i stabilimenteve energjetike të përmendura në paragrafin (1) të këtij neni bëhet në tokë joprivate, Qeveria ose komuna përkatëse, me propozimin e Ministrit përgjegjës për energji, mund të trasferojë ose të vendosë të drejta për ndërtim në favor të ndërmarrjes për energji, në përputhshmëri me rregullat e parashtruara në aktet nënligjore të nxjerra sipas këtij ligji dhe ligjeve tjera në fuqi.

Neni 27

27.1. Ndërmarrjet për energji kanë të drejtë të shfrytëzojnë në rast nevoje të arsyeshme disa pjesë të ndërtesave për vendosjen e pajisjeve për matje si dhe pajisjeve të tjera që kanë të bëjnë me furnizimin me energji elektrike, ngrohje dhe gas natyror.

27.2. Ndërmarrjet për energji kanë të drejtë të shfrytëzojnë në rast nevoje të arsyeshme urat, rrugët, trotualet dhe ndërtesat e tjera, që nuk janë në pronësi të tyre, për ndërtimin, lidhjen, kalimin dhe mirëmbajtjen e linjave ajrore dhe tokësore të energjisë elektrike, gypave për ngrohje, gypave të gasit, gypave të ujit.

Neni 28

28.1. Personat fizik dhe juridik do të lejojnë zyrtarët që ushtrojnë inspektime në përputhshmëri me këtë ligj, mund të hyjnë dhe të kalojnë në pronën e çfarëdo individi për ushtrimin e aktiviteteve të tyre në lidhje me inspektimin dhe mirëmbajtjen e stabilimenteve energjetike, instalimeve apo sistemeve.

28.2. Personat fizikë dhe juridikë do t'u lejojnë ndërmarrjeve për energji qasje në pronën e tyre në të cilën gjenden stabilimentet, pajisjet, rrjetat, ose sistemet energjetike, me qëllim të mirëmbatjes apo kontrollimit të tyre, prerjes së pemëve ose vegjetacionit tjetër që mund të pengoj veprimin e pajisjeve, rrjetave ose sistemit.

28.3. Personat fizikë dhe juridikë janë të obliguar t'u lejojnë qasje ndërmarrjeve për energji, për inspektimin e pajisjeve për matje që gjenden në pronën e tyre dhe s'mund të ndalojnë ndërmarrjet për energji të bëjnë ç'kyçjen e pajisjeve për matje ose pajisjeve të tjera në lidhje me sitemin e energjisë.

Neni 29

29.1. Ndërmarrjet për energji duhet t'i kompensojnë pronarët ose shfrytëzuesit e pronës për çfarëdo dëmi që mund të shkaktohet gjatë ushtrimit të aktiviteteve të tyre që mund të rezultojë në kufizimit të shfrytëzimit të pronës ose zvogëlimit të vlerës së saj.

29.2. Ministria përgjegjëse për Energji, do të përcaktojë kriteret dhe kushtet e kompenzimit me aktet nënligjore.

Neni 30

30.1. Zonat e sigurisë duhet të vendosen përreth lokaliteteve energjetike.

30.2. Brenda çfarëdo zone të sigurisë është i ndaluar ose i kufizuar ndërtimi ose çfarëdo ndërtesë apo godine, prerja e bimëve ose pemëve, ose ushtrimi i aktiviteve që mund të paraqesin rrezik ndaj sigurisë ose veprimitarisë së pandërprerë të instalimeve energjetike, sigurisë së shëndetit, sigurisë së jetës dhe sigurisë së pronës.

30.3. Kushtet dhe mënyra e përcaktimit të lokacionit, madhësia, kufijt e zonave të sigurisë, regjimi i tyre si dhe të drejtat dhe detyrimet e pronarëve përcaktohen me akt nënligjor që miratohet nga Qeveria.

Neni 31

Kur pronarët ose shfrytëzuesit e pronës bëjnë ndërtime të palejuara, rrethime, prerje ose aktivitete të tjera që janë në kundërshtim me rregullat për zonat e sigurisë, dhe dështojnë përpjekjet për ndalimin e ndërtimeve ose aktiviteteve të tilla ilegale të paautorizuara brenda afateve kohore të vendosure nga ndërmarrjet për energji, ndërmarrja për energji është e autorizuar që të kërkojë nga Komuna ndalimin dhe heqjen e ndërtimeve ilegale ose ndalimin e aktiviteteve, me shpenzime të pronarit ose shfrytëzuesit.

Kreu 9 Mbikqyrja

Neni 32

32.1. Inspektorati i Energjisë themelohet pranë Ministrisë përgjegjëse për energji dhe ndërmerr aktivitete të inspektimit dhe mbikqyrjes sipas këtij ligji.

32.2. Roli kryesor i Inspektoratit të Energjisë është që të sigurojë veprimtari të sigurtë dhe të qëndrueshme të pajisjeve energjetike, instalimeve dhe sistemeve.

32.3. Inspektorati i Energjisë është përgjegjës për të siguruar që ndërmarrjet për energji t'i ushtrojnë aktivitetet e tyre në përputhshmëri me ligjet mbi energjinë, rregulloret teknike, standardet dhe rregullat e tjera që zbatohen në lëminë e energjisë elektrike, në lëminë e energjisë për ngrohje dhe gasit natyror.

32.4. Në lëminë e energjisë elektrike, energjisë për ngrohje dhe gasit, Inspektorati i Energjisë ushtron mbikqyrje në prodhimin, ndërtimin, ekzekutimin dhe testimet fillestare, eksperimentimin dhe shfrytëzimin e pajisjeve, centraleve, linjave dhe instalimeve për prodhimin, bartjen, distribuimin, matjen, deponimin dhe konsumimin e energjisë elektrike, energjisë për ngrohje dhe gasit natyror.

32.5. Aktivitetet e mbikqyrjes mund të ndërmirren gjithashtu edhe nga autoritete tjera në bazë të ligjeve të veçanta, për të kontrolluar ndikimin e aktiviteteve të energjisë në mjedis dhe në shëndetin publik, si dhe për të siguruar që aktivitetet e tilla të jenë në përputhshmëri me ligjet dhe standardet mbi mbrojtjen e mjedisit dhe shëndetit publik.

Neni 33

33.1. Gjatë inspektimeve ose mbikqyrjeve, inspektorët e Inspektoratit të Energjisë kanë të drejtë të:

- a). inspektojnë pajisjet, materialet si dhe dokumentacionet teknike të tjera në përputhshmëri me qëllimin e inspektimit ose mbikqyrjes, si dhe të kërkojnë provat e nevojshme, të marrin mostra dhe, sipas nevojës, të shfrytëzojnë organizatat profesionale ose ekspertë për ushtrimin e inspektimit ose mbikqyrjes;
- b). kenë qasje të lirë në shërbimet energjetike nën mbikqyrjen e tyre;
- c). kryejnë inspektime të gjendjes teknike dhe sigurisë së pajisjeve energjetike në bazë të rregulltë ose kurdo që kërkohet;
- d). nxjerrin deklaratat mbi shkeljen e këtij ligji ose akteve nënligjore të nxjerra si pasuese të tij;
- e). nxjerrin urdhëra për mbylljen e ndërmarrjeve për energji kur konstatohet se janë bërë shkelje.

33.2. Të gjithë personat duhet t'i përmbushin udhëzimet e lëshuara nga inspektorët e energjisë gjatë ekzekutimit të detyrave të tyre sipas këtij ligji.

Neni 34

Personat fizikë ose juridikë që posedojnë ose operojnë stabilimente, pajisje, godina, sisteme ose instalime energjetike, për të cilat sipas këtij ligji parashihet inspektimi, obligohen të informojnë menjëherë inspektoratin e energjisë mbi çfarëdo dëmi ose gabimi që mund të shfaqet si pasojë e ndërprerjes së furnizimit të energjisë, ose nëse ekziston rreziku për jetën, shëndetin e njerëzve, trafikut, godinave fqinje apo mjedisit rrethues.

Neni 35

Nëse një ndërmarrje për energji ose njëdonjë person tjetër fizik ose juridik ushtron aktivitete në kundërshtim me këtë ligj, me aktet nënligjore të nxjerra në bazë të tij, standardet në fuqi ose rregullat e tjera sipas këtij Kreu, Inspektorati i Energjisë mundet:

- a). t'u dërgojë njoftim me shkrim që përmbanë udhëzime të detyrueshme për korigjimin e shkeljeve mbrenda një afati të caktuar;
- b). t'i propozojë Zyrës të Rregullatorit për Energji që të suspendojë, ndryshojë ose tërheqë liçencën e tyre;
- c). t'i propozojë Zyrës të Rregullatorit për Energji të vendosë gjoha administrative dhe dënime sipas këtij ligji;
- d). ta dërgojë çështjen para autoriteteve kompetente për të ndërmarrë masa të mëtutjeshme që nuk janë nën mandatin e Inspektoratit;
- e). të informojë publikun mbi çfardo veprimtarie ilegale.

Neni 36

36.1. Inspektorët e Inspektoratit të Energjisë duhet të mbajnë të fshehtë çfardo informate zyrtare ose afariste që ata e hasin gjatë ushtrimit ose në lidhje me inspektimet e tyre.

36.2. Inspektorët e Inspektoratit të Energjisë ushtrjnë aktivitetet e tyre vetëm, ose, në rast të nevojës, së bashku me organe të specializuara të kontrollit siç e shohin ata të nevojshme.

Kreu 10
Dispozitat Kalimtare

Neni 37

37.1. Brenda dymbëdhjetë (12) muajve pas shpalljes së këtij ligji, Kuvendi i Kosovës miraton Strategjinë për Energji.

37.2. Brenda dymbëdhjetë (12) muajve pas themelimit zyrtar të Ministrisë përgjegjëse për energji, Ministria në fjalë miraton aktet nënligjore për zbatimin e këtij ligji.

37.3. Përderisa të themelohet Ministria përgjegjëse për energji në Kosovë, kompetencat, detyrat dhe funksionet që i janë dhënë Ministrisë në fjalë nga ky ligj do të ushtrohen nga Zyra e Energjisë pranë Zyrës së Kryeministrit.

Neni 38

Ky ligj hyn në fuqi mbas miratimit të tij nga Kuvendi i Kosovës dhe në ditën e shpalljes nga PSSP-ja.

Ligji nr. 2004 / 8

29 Prill 2004

Kryetari i Kuvendit të Kosovës,

akademik Nexhat Daci